



Matius 8



Abis Yesus pili Natanael deng Filipus, akang pung lusa bagini, ada pesta kaweng satu di kota Kana. Kota ni ada di propinsi Galilea. Waktu itu, Yesus pung mama ada di pesta tu. Yesus deng Antua pung murid-murid jua dapa undang par pi ka pesta tu lai.



Mar waktu pesta tu ada bajalang bagini, tuang ruma pung anggor abis. La Yesus pung mama bilang par Antua kata, "Nyong e, dong pung anggor su abis." Mar Yesus pung mama bilang par orang-orang karja di situ kata, "Dengar bae-bae! Kamong musti biking apa sa yang Antua bilang."



Yesus bilang par orang-orang karja di situ kata, "Mari isi tampayang anam tu deng aer do!" La dong isi tampayang-tampayang tu sampe pono.



3

Abis itu Antua bilang par dong kata, "Sakarang, timba aer sadiki dari dalang tampayang tu la bawa akang par orang yang urus pesta ni." Jadi dong bawa akang par orang yang urus pesta tu.



4

Waktu orang yang urus pesta tu rasa aer yang orang-orang karja tu bawa, aer tu su jadi anggor. Orang yang urus pesta tu seng tau kata anggor tu datang dari mana. Mar, orang-orang karja yang bawa aer par antua tu tau. Pas antua rasa kata anggor tu enak, antua langsung panggél panganting laki-laki tu.




5

Antua bilang par dia kata, "Bu! Kalo ada pesta-pesta macang bagini, katong biasa kasi kaluar anggor yang enak kamuka. Nanti kalo orang-orang yang datang su puas minong do baru katong kasi kaluar anggor yang seng talalu enak. Mar yang ale biking ni laeng lai. Ale kasi kaluar anggor yang enak ni dari balakang."



6

Apa yang Yesus biking di kota Kana di propinsi Galilea, itu Antua pung tanda herang pertama. Deng tanda herang tu, Antua kasi unju Antua pung kuasa yang hebat par orang-orang. Oras tu jua, Antua pung murid-murid langsung percaya Antua.





7

Satu kali bagini, Yesus pi ka Petrus pung ruma. Waktu itu, Antua lia Petrus pung mama mantu ada di tampa tidor tagal antua damang.




8

Tarus, Yesus pegang antua pung tangang, la antua pung damang ilang. Tarus, antua bangong la taru makang par Yesus dong.




9

Akang pung amper malang, orang-orang datang bawa samua orang yang saki deng takanal par Yesus. Orang-orang paleng banya dari dalang kota tu datang bakumpul di muka ruma tu.



10

La Antua kasi bae dong samua yang saki tu dari dong pung sagala macang panyaki deng user setang-setang dari orang-orang yang takanal tu. Antua seng kasi biar setang-setang tu par bicara sadiki lai, tagal setang-setang tu tau Antua tu sapa.




11

Samua orang manggurebe sonto Antua, tagal ada kuasa yang kaluar dari Antua pung diri par kasi bae orang saki, la samua orang yang sonto Antua tu jadi bae.




12

Jadi, orang-orang paleng banya datang bakumpul di ruma tu sampe seng ada nat sadiki lai par badiri. Mala di muka pintu jua su pono sasa deng orang-orang.



13

La Antua kasi balajar Allah pung ajarang par orang banya tu. Waktu Antua ada kasi balajar, ada orang-orang datang bawa orang lumpu satu par Antua. Ampa orang pikol dia deng palbet.




14

Mar tagal orang talalu banya, dong
seng bisa bawa maso dia par Antua.
Jadi dong nai ka atas ruma
tu la bongkar akang pung
atap pas di atas Antua.



15

Tarus, dong kasi turung dia
lapis deng dia pung
palbet par Antua.



16

Waktu Antua lia dong biking bagitu,
Antua tau kalo dong
parcaya Antua bisa kasi
bae dia, jadi Antua
bilang par dia kata,
"Ana e, Beta su kasi
ampong ale pung
dosa-dosa." "Badiri,
angka ale pung
palbet tu
la pulang!"




17

Tarus, Yesus nai parau la Antua pung murid-murid jua
iko Antua. Waktu dong ada
balayar, skrek bagini anging
ribut basar datang la
galombang pukul parau
tu sampe aer maso.
Mar waktu itu
Yesus ada tidor.



18

La Antua bilang kata, "Mangapa kong kamong taku?
Kamong kurang parcaya Beta!" Tarus, Antua bangong
la hokmat anging deng galombang tu. Langsung dano
tu licing macang deng minya. Lia bagitu,
Antua pung murid-murid
taherang-herang la bilang
kata, "Antua ni sapa,
sampe anging deng
galombang jua iko
Antua pung parenta?"



19

Tagal Allah
paleng sayang
manusia di dunya ni sampe Antua utus
Antua pung Ana satu areng-areng ni
datang ka dunya par tabus manusia pung
dosa-dosa. Antua utus Antua pung
Ana ni biar sapa sa yang parcaya
Antua pung Ana ni, dia seng
mati tarus, mar hidop
tarus-tarus
deng
Antua.

20

Roma 3:23

Tagal samua orang su bardosa deng su jau dari Antua yang hebat deng luar biasa tu.

Roma 6:23

Barang, tagal dosa, katong mati tarus-tarus. Mar tagal Allah pung hati bae, katong hidop tarus-tarus tagal katong satu hati deng Tuhan Yesus Kristus yang katong somba.

Ibrani 9:27

La sama deng Allah su putus kalo manusia tu cuma mati satu kali la abis itu Antua putus dia pung parkara,

21

Efesus 2:8,9

Jadi, tagal Allah pung hati bae, Antua kasi selamat kamong tagal kamong parcaya Yesus Kristus. Kamong selamat bukap tagal kamong pung usaha sandiri, mar tagal Antua pung mau sandiri par biking bagitu. Jadi, tagal itu bukap kamong pung usaha sandiri, jang ada satu orang lai yang makang puji soal itu.

Roma 10:9,10

Katong kasi balajar bagini: Kalo kamong mangaku deng kamong pung mulu kata Yesus tu Tuhan yang parenta kamong la parcaya dalang hati kalo Allah su kasi hidop Antua kombali, Antua nanti kasi selamat kamong. Barang deng hati, orang parcaya la Allah biking dia jadi batul di muka Antua. La deng mulu, orang mangaku la dapa kasi selamat.

22

Yohanis 3:16,17

Tagal Allah paleng sayang manusia di dunya ni sampe Antua utus Antua pung Ana satu areng-areng ni datang ka dunya par tabus manusia pung dosa-dosa. Antua utus Antua pung Ana ni biar sapa sa yang parcaya Antua pung Ana ni, dia seng mati tarus, mar hidop tarus-tarus deng Antua. Barang, Antua utus Antua pung Ana ni par datang ka dunya, bukap par hukum manusia, mar par kasi selamat manusia dari dong pung dosa-dosa.

23

1 Yohanis 5:11-13

Katong parcaya kalo apa yang Allah bilang par katong tu batul. Antua bilang kalo katong bisa hidop tarus-tarus deng Antua tagal katong su parcaya Antua pung Ana. Jadi sapa yang parcaya Antua pung Ana, dia nanti hidop tarus-tarus deng Antua. Mar sapa yang seng parcaya Antua pung Ana, dia seng bisa hidop tarus-tarus deng Antua. Basudara samua yang parcaya Allah pung Ana, beta tulis surat ni biar kamong tau batul-batul kalo kamong su mulai hidop tarus-tarus deng Allah.

24

Matius 8-9; Markus 1-2, 4; Lukas 4, 8; Yohanis 2

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: E. Frischbutter, Sarah S.

Malay, Ambonese NT (abs) © 2022, Sinode Gereja
Protestan Maluku

<https://www.bible.com/en-GB/bible/2734/MAT.1>

©2026 Bible for Children, Inc.
www.M1914.org www.bibleforchildren.org

25